

左恪靖侯奏稿續編

恪靖奏稿續編卷二十七目錄

中路官軍剿回大勝摺

南路官軍迎剿連勝摺

請調馬德昭移駐陝境片

定邊失守請飭郭寶昌肅清湘皖兩軍餉道片

辦結土匪張貴等片

北路官軍進剿疊勝摺

雷正綰等剿賊獲勝片

金運昌會剿獲勝片

請 飭部頒發湖北牙釐章程並頒給部帖片

拏辦逆匪張維並陳日新革職留營片

賊踪紛竄現籌剿辦並自請嚴議摺

請 飭定安籌撥濟劉松山等軍食片

剿辦固原山東回上各匪擒斬巨逆摺

劉松山陣亡現籌辦理情形摺

請 賞劉錦棠京銜並派總統幫辦片

請 飭定安速解老湘卓勝兩軍軍食片

中路官軍剿回大勝摺

奏爲中路官軍截剿竄回大獲勝仗恭摺仰乞

聖鑒事竊陝回收遁狄道後屢次出巢掠食均經官軍  
擊敗嗣據獲賊供稱陝回馬鎮和等逆被剿窮蹙糧草  
缺乏潛遣人由金積堡至狄道曠逆日崔三禹得彥馬  
生彥白彥虎等股眾潛襲平角城官軍營壘掠取軍糧  
乘勢東犯以攻雷正綰等軍之背而解金積之圍十一  
月二十九日申刻升用提督徐占彪調逆回馬步數千  
出狄道向安定西北好麥川巉口稱鉤驛等處絡繹奔

赴卽帶所部步隊三營會商總兵裴忠朝率所部馬隊  
星夜馳奔巉口擊之一面布置安定城守楊世俊卽出  
紅土密率所部馬隊各營馳赴巉口會剿是夜四鼓各  
營馬步抵巉口瞭見好夢川稱鈞驛及巉口迤東之張  
家莊等處火光遍野逆眾蟬集徐占彪率馬步分中左  
右三路猛攻巉口飭副將黃志元步隊橫出稱鈞驛以  
馬隊輔之楊世俊率張仲春楊德俊馬隊循山脊繞出  
稱鈞驛之前截賊歸路巉口之賊卽向北路魯家溝狂  
奔徐占彪躡殺四十餘里追至石峽灣收回巉口其稱

納驛之賊分由好夢川會合內關營賊向西南折竄官軍疑其遁回狄道也遂收隊回安定是役共斃賊二百餘名生擒三十七名奪獲騾馬二百餘匹官軍受傷勇丁二十五名此徐占彪楊世俊各營截剿竄回獲勝之情形也歸營後訊據擒賊馬彥江彥首等供稱巉口竄出之賊爲崔三好麥川內關營竄出之賊爲禹得彥馬生彥白彥虎各股卽飛報陝安道黃鼎自靜甯出會甯截之十二月初一日黃鼎各營抵會甯迤北之郭城驛逆回已由紅堡子向打拉城長流水一帶疾馳而東矣

初三日五鼓記名提督周紹濂訓賊近半角城率隊迎擊賊已撲入半角城回堡周紹濂揮隊沿河截剿斃賊百餘名生擒二名官軍傷亡二十餘名半角城回堡西南二十里瀾泥溝段家溝爲陝回逆眷寄頓之所官軍前破李旺堡穆家潭回寨及打拉城大捷時陝回眷屬多已衝散逆首馬生彥之黨馬金倉收集就撫官軍以其中多老弱婦女釋之暫安插於西山瀾泥溝段家溝甘回莊寨兩月以來尙稱安謐至是突起應之周紹濂中營及所部右後兩營皆附半角城回堡北結營其右

後兩營適因金積堡賊出竄北路馬家河灣一帶截阻官軍運道正派令會同副將杜錫楨馬隊分途搜剿尙未收回老營賊至以中營及右後兩營所留三成隊伍鏖戰敗賊然兵力過單賊陷踞半角城回堡不能遏也是日右後兩營聞賊撲半角城恐老營有矢急拔營馳回策應右營營官總兵銜儘先補用副將劉甫田率步隊親兵二十餘名薄暮趨程疾進行數里陷澗中適兩旁騎賊蜂至劉甫田挺矛躍馬左右衝突刺斃悍賊多名卒以眾寡不敵立殞陣前比副將陳高華率右營隊



伍至賊已遁矣乃整隊回營是夜後營營官參將毛正  
明率隊南進李廣間行三十里至王家團莊天色正明  
調距莊五里之高崖子有騎賊數百正圍攻民堡而東  
路糧車假道而北者絡繹於道當會同總兵王銘忠各  
督馬步馳赴高崖子擊賊賊駭而奔毛正明當分兵交  
王銘忠助守軍糧自率隊伍躡賊至半角城漏已四下  
矣初四日黎明周紹濂派毛正明陳高華督隊分中左  
右三路進攻半角城回堡一鼓克之斃賊二百餘名奪  
獲騾馬五十餘匹糧食數千斤官軍陣亡弁勇三十餘

名帶傷八十餘名敗寇竄過河西段家溝等處薄暮官軍收隊回營此周紹濂所部中右後三營連日截剿陝回獲勝之情形也臣前因半角城以北游騎剿掠糧運中梗檄提督丁賢發由固原前進搜剿正啓行間半角城警報適至又加派道員魏光燾步隊副將銜儘先參將劉錦臣馬隊繼進飭提督左日升留閭儘先補用參將馮南斌所部防固原頭品頂戴記名提督陳廣發所部防瓦亭節節護運前進續據北路諜報馬鎮和喉其黨安燕千餘眾出掠康馬頭一帶而段家溝踞賊初四

五日以後人馬又忽增至數倍賊勢更張初六日魏光燾丁賢發馬步由固原鼓行而北初八日進李家瓜園是夜周紹濂所部分防黑城子李旺堡之前左兩營步隊護糧過王家園莊迤北十餘里之墩子溝圍王銘忠調良回馬柏森馬隊爲前導遇劫糧賊騎狂奔而來異常悍鷙馬柏森眾寡不敵馬隊被賊衝散陣亡回勇六名前營營官總兵李良穆左營幫辦副將周玉林各以所部步隊結圓陣禦之輜糧居中外環刀矛鎗礮騎賊六七百縱橫衝突十數次官軍屹立不動遇賊近則鎗

破輪轟之賊中人馬應聲而倒逆騎不得逞復狀步賊  
千餘猛撲陣前軍士皆殊死戰無不一以當十戈矛截  
刺終夜有聲步賊不敢近退入破堡以叉子鎗穴牆對  
擊騎賊則分起環繞更番不休李良穆左肩被賊鎗子  
洞穿復裹創血戰軍士屹立一夜一晝勺水不入口相  
持至初九日酉刻魏光燾丁賢發各帶所部馳至賊死  
傷已多復見官軍大至狂遁而西官軍壓追十餘里齊  
抵半角城魏光燾丁賢發直搗段家溝賊巢由川東進  
周紹濂由川西進賊悉眾越西山遁走官軍乘勢將攔

泥溝段家溝等處賊巢一律盪平。躡賊二十餘里至峽口。該逆由長流水西竄鹽茶各振旅而還。計初八夜至初十日各戰斃賊七八百名。生擒八十餘名。訛畢斬之。拔出男婦老弱百餘口。兵勇傷亡五十餘名。此官軍連日截剿竄回蕩平賊巢獲勝之情形也。賊敗竄至鹽茶廳。仍四出掠食。蔓延西南。莎蘿堡鴉兒灣水淡溝一帶。初十日黃鼎自會寧馳回靜寧。由硝河城黑城橫截而出。十二日馳抵莎蘿堡。東十餘里偵騎賊二三百正在圍攻甘回堡寨。黃鼎麾馬隊掩擊之。斃悍賊四五十名。

餘逆遁歸鹽茶黃鼎留副將林定遠護輜重駐莎蘿堡  
自督馬隊趨行薄暮抵鴉兒灣十餘里距鹽茶五十餘  
里適騎賊數百正由鴉兒灣南竄飭副將黃虎臣縱馬  
隊橫截其腰斃賊二十餘名奪戰馬三十餘匹餘逆向  
鴉兒灣敗竄副將胡應芳怒馬直前躡近鴉兒灣四五  
里從間道馳出忽悍騎數百圍逼而來胡應芳督隊迎  
敵正搏戰間黃虎臣馬隊總兵韋占雄李三春步隊從  
後蹙至立斃悍賊數十騎收賊入鴉兒灣憑牆抗拒黃  
鼎乘月色微茫密派李玉春韋占雄挑壯士數十人倍

道繞出鴉兒灣左右沿山縱火爲疑兵親督馬步直擣中路賊眾慌亂登時回西北潰走官軍三面抄殺陣斬賊中悍目僞領員楊黑牛藍遇春等三十餘名奪騾馬百餘匹二鼓就鴉兒灣休息據擒賊供崔三已越鴉兒灣西南三十里趨老虎溝其由鴉兒灣西北敗遁者禹得彥各股也黃鼎當飛飭林定遠帶隊由莎蘿堡橫出老虎溝兜剿而前赴鴉兒灣合隊四鼓馬探報禹得彥去而復來黃鼎警巡邏嚴守備以待忽西北角喊聲突起有悍賊數十人撲近營壘黃鼎令軍士移燈滅火鎮

靜以待潛遣都司李洪超率銳卒數十人悄入賊中刀  
矛亂刺賊眾驚潰斬馘數十名生擒三名據供禹得彥  
度官軍遠戰疲乏嗾悍賊數百前來劫營不料爲官軍  
所敗林定遠所部行近老虎溝已五鼓矣調逆回蟻聚  
各回莊催隊疾進掩其不備斃賊數十名餘逆向西南  
狂遁天明收隊抵鴨兒灣黃鼎分兵扼鴨兒灣自督馬  
步進水淡溝西安堡劉家井連日搜剿而西該逆百十  
成羣彌漫山谷見官兵卽遁疲驢病馬拋棄滿途據賊  
中逃出難民供稱禹得彥十三日四鼓轉鴨兒灣之後



連夜向紅堡子遁郭城驛分股由中灘出打拉城竄靖遠而西賊糧缺乏大半煮牛皮茹草子爲食黃鼎正擬分路窮追嗣崔三一股復由大宏溝新營川竄右武營可南走硝河城以達靜海當收隊回防道出李家堡清查南入營就撫甘回馬繼祖馬其那李子昌馬海奇等五百餘家勒繳馬械誅從賊之馬宗德等三名總計鹽茶之役其斃賊三百餘名擒獲數十名奪獲騾馬三百餘頭此黃鼎一軍連日截剿竄回獲勝之情形也十五日楊世倭徐占彪瞭郭城驛一帶炊煙四起料東竄之

賊必經官軍截剿而西圖竄嶢口歸狄道當分馬步數路伏張家莊左右破堡約以火箭爲號四鼓賊眾竄集各路官軍馬步突起號鼓齊鳴該逆倉皇挺走張仲春楊德俊總兵殷華廷馬隊亦自紅土窰率隊出張家莊助剿分途西追三十里至馬家堡沿途斃賊數百名生擒八十餘奪騾馬器械無算十六日未刻收隊回張家莊據生擒賊供此股卽馬生彥禹得彥崔三馬金倉股眾連日經官軍追剿分三路西趨崔禹兩逆之黨悍目僞領員楊士明馬祿已斃於陣訖畢斬之同時河州回

目馬占煞等亦喊逆黨山大營川好麥川兩路東出巉  
口車道嶺護陝回賊脊楊世俊徐占彪會商官軍馬  
隊出大營川步隊出好麥川乘該逆喘息未定擊之是  
夜月明如晝楊世俊督馬隊由張家莊北原安家墩出  
車道嶺瞭見西竄敗賊漫山遍野楊世俊縱隊擊之臨  
至甘草古摘斬極多餘眾向狄道遁逸十七日黎明大  
營川忽橫出悍騎數百楊世俊知爲狄河援賊也飭馬  
隊分中左右三路迎敵該逆下馬挺矛死鬪官軍亦分  
枝改騎爲步仍以馬隊抄大營川之後楊世俊督殷華

廷率隊衝其前斬悍賊數十名逆勢披靡紛紛潰散官軍乘勢躡至高崖斃賊百餘名奪戰馬百餘匹該逆狂奔而西未刻收隊紮車道嶺其好麥川一路徐古彪於十六日二鼓率步隊前行抵杜家岔溝該逆猝不及防徐占彪滾隊撲上斃賊三百餘名追至漫窪正收隊東向山左右礮聲震烈突出馬步賊四面包夾副將何玉超攻其左黃志元攻其右徐占彪督隊居中鎗礮環轟賊不少卻徐古彪揮戈突陣手帶矛傷勇士如牆而進併力壓之斃賊多名賊眾大敗官軍縱追十餘里該逆

擁擠不前隊崖塹者不計其數薄暮收隊距巉口迤西六十里之蒲家堡駐紮二鼓該逆馬步復折而東連夜撲犯官軍營壘數次均經徐占彪督隊擊敗十八日黎明會合楊世俊遍搜山谷斬獲殘匪多名日暮收回巉口道員李玉南先於十六日辰刻由紅上窩整隊西行十七日五鼓抵巉口偵禹馬等逆已經徐占彪楊世俊擊敗而西崔三後股又將偷越巉口李耀南率同總兵周顯明蕭寶謙副將盛照魁等步隊銜枚疾進截擊於巉口二十里之鹽溝地勢險隘不容方駕逆眾憑卡死

拒官軍火器環施刀矛繼進賊勢不支紛紛敗北轟斃  
刺斃跌斃者不少奪獲騾馬百餘匹餘逆越魯家溝北  
奔已刻官軍收隊回曉口休息十八日窮搜而北崔逆  
已向郭城驛南趨各軍十九日均回防所謀報崔逆十  
八日竄踞會寧迤南二十里之康家堡黃鼎留防會寧  
之總兵趙興隆帶所部七成隊潛師夜起襲之斃賊約  
三百名擒斬十餘名奪騾馬牛羊無數餘逆循豹子川  
南竄紅土窑李耀南隨楊世俊率隊出安定會剿十九  
日酉刻先後抵紅土窑設伏以待二十日三鼓賊騎逾

紅土密北原俯瞰官軍官軍佯爲不知四鼓崔逆率千餘騎從花尖堡越李家河楊世俊李耀南馬步分道抄擊該逆四面被創截成數起尾賊百餘騎折而北遁盛照魁楊德俊裴思朝馬步邀截之一股數十騎由花尖堡遁府子川周炳榮馬隊聚殲之一股百餘騎由李家河奔李家灣提督銜記名總兵黃儲寶追剿於後總兵殷華廷副將姜鳳典候選知縣胡嗣曾攔截於前無一脫者在三率七百騎死黨越李家河趨王家岔楊世俊李耀南督馬步跟踪壓追張仲春馬隊復夾麻子川東

西兩原飛駛通安驛邀其去路該逆拚死抵禦經官軍鎗轟矛刺而殞者不下二三百名崔三率數十騎狂遁而西殿後數百騎經各路馬步合勢圍剿陣斬僞副元帥馬得海擒崔三之叔崔官騎賊悉就誅戮得逸出者不過二十騎耳步隊追至馬家河馬隊躡至皋陶河楊世俊復挑數十騎窮追崔逆弗及戊刻回安定防所訛據賊供崔三不料官軍回防如是之速圖由紅士窺偷竄不料正遇官軍遂至大敗計十二月十六日十七日入二十口之戰斃賊實二千數百名生擒三百數十名



其逆眷之填溝壑者無算等獲戰馬駝騾近千匹器械  
無數官軍傷亡弁勇三十餘名此楊世俊徐占彪李耀  
南趙興隆馬步各營截剿竄回大獲勝仗之實在情形  
也臣惟金積堡陝回被剿窮蹙其勾引南竄狄道諸逆  
劫糧阻運事在意中此次崔禹馬等逆悉銳北竄勢頗  
披猖一挫於周紹濂半角黑城諸戰再挫於黃鼎鶚兒  
潛老虎溝諸戰其敗歸也復爲楊世俊徐占彪等所截  
統計前後擒斬之數實逾三千而墜崖落澗餓斃自盡  
不與焉諸軍於歲暮嚴寒之時馳驅於水枯草絕之地

卒能踴躍用命痛挫兇鋒在事出力員弁勇丁可否擇  
尤酌保以示鼓勵之處出自

逾格鴻施陣亡之總兵銜儘先補用副將赫勇巴圖魯  
劉甫田明幹樸勇轉戰數省卓著戰功茲以助剿北路  
刼掠竄賊獲勝後急回顧牛角老營中途遇賊血戰  
捐軀殊堪憫惻應請

天恩飭部照總兵例從優議給

卹典其餘衝鋒冒險力戰陣亡之副將邱元章徐廣發  
王清祿游擊饒開鈞把總黃占奎黃安邦均請照所保

官階

賜卹以慰忠魂謹會同幫辦陝甘軍務署陝西撫臣劉  
典恭摺馳陳伏乞

皇太后

皇上聖鑒訓示施行謹

奏

同治九年正月初八日

南路官軍迎剿連勝摺

奏爲南路官軍迎剿河狄鼠回連獲勝仗恭摺馳報仰  
乞

聖鑒事竊甘南鞏秦所屬地方當河狄逆回出竄衝要  
上年九月二十五至十月初二等日經鹽運使銜分發  
補用道湯聘珍記名提督涼州鎮總兵傅先宗各軍扼  
剿竄回於西和禮縣一帶折遁狄河兇鋒稍斂然勾結  
陝回崔三禹得彥各股敗寇仍不時覬覦南路牽綴官  
軍嗣臣宗棠奏派周開錫令湯聘珍督同提督梅開泰  
所部扼漳縣而營傅先宗駐軍鞏遠分枝由徽成出西  
和禮縣節節搜剿作爲遊剿之師十一月二十二日賊  
眾擾及西和縣附近地方以撫民堡伺提督丁桂智馬

隊將至聞風宵遁十二月初一日丁桂智追賊至禮縣屬之巖城謂賊結寨於石東溝距巖城三十里初二日黎明丁桂智分馬隊繞出賊前派副將田大伏兵於石東溝西南要隘親督候選知府已革湖北鄖西縣知縣程光第直搗中堅賊方排谷口而陣官軍併力壓下賊勢不支踰溝越嶺而遁適官軍馬隊迎擊其前田大所部橫擊其中丁桂智程光第率隊張左右翼從後蹙之賊眾大敗把總吳振高貪拾財物丁桂智立斬於陣軍士股栗悉銳直前抄殺躡二十餘里斃賊三百餘名生

擒三十八名奪獲大旗十面矛一百數十餘件薄暮收  
隊就地安營訶零股賊眾數百嘯聚敗寇回踞石東溝  
十餘里蔡家山陶坪莊意圖抗拒詰朝丁桂智戒各營  
秣馬蓐食整隊馳進察看蔡家山懸巖峻坂鳥道螺旋  
賊踞其中分悍黨百餘憑隘口以拒官軍丁桂智察其  
未可以力攻而下挑壯士改騎爲步踰山脊壓下以掣  
其勢田大程光第催隊從峽口猛進賊正恃險穩抗不  
虞官軍徑搗其巢也返顧慌亂號叫狂奔墜崖殞者三  
四百人馬隊分途截殺二百餘名生擒六十名巢賊數

百無跳免者奪獲大旗十四面鎗礮刀矛數百件騾馬  
百餘匹官軍陣亡三員此傳先宗派丁桂智各營在禮  
縣石東溝蔡家山剿賊獲勝之情形也同時甯遠西南  
包家莊雙礮柱亦有賊踪竄擾十二月初一日傳先宗  
派提督高月桂總兵蘇家良馬步馳剿初二日抵包家  
莊詎賊翕聚南山蟠結未動初三日黎明官軍步隊伏  
山左右馬隊分枝抄賊歸路以一枝挑戰該逆從山峽  
中衝出異常獷悍官軍馬隊且戰且走誘其離巢漸遠  
步隊從左右攢矛競進鎗礮環轟馬隊前後夾擊之斃

賊四百名餘逆六七十名敗向雙碌柱合股官軍乘勝  
搗巢一鼓而克斃賊三四百名生擒十四名奪獲騾馬  
百餘匹餘逆入九十名狂遁而西官軍勇丁稍有傷亡  
此傅先宗派高月桂蘇家長在寧遠包家莊雙碌柱剿  
賊獲勝之情形也兩次生擒之賊七十四名經道員黃  
慶章總兵桂林香訊明被脅漢民九名當准本地士紳  
保釋其餘六十五名內有逆首王老虎立馬當先指麾  
羣賊副將屈邦彩陣擒之計畢分別斬梟初八日湯聘  
珍調漳縣三岔以西逆眾千餘騎麇集比令提督梅開



秦挑銳卒五六百派副將楊永成常遠藻領之乘黑夜  
斫賊營漏三下官軍潛入賊巢揮刀亂斫夾以火器該  
逆自夢中驚起駭怖失措官軍乘機掩殺斃賊六七十  
名奪戰馬數十匹獲鞍廐器械甚夥敗賊逸汪家衛初  
九日黎明梅開泰督馬隊蹕至王家河出石灰溝口沿  
途斬賊極多賊屍盈野餘逆遁入狄達此湯聘珍督同  
梅開泰馬步在漳縣三岔一帶剿賊獲勝之情形也臣  
維甘南諸軍裁併之後壁壘新立士氣奮興自十二月  
初一至初九日擒斬賊數不下二千餘名實足壯軍聲

而寒賊膽此次在事最爲出力之員弁勇丁可否容卹  
擇尤酌保以示鼓勵之處出自

天恩所有陣亡之游擊杜敬仲守備張自新把總周八  
士三員均係血戰捐軀應請

飭部各照官階議給

卹典以妥忠魂謹會同幫辦陝甘軍務署陝西巡撫臣  
劉典合詞馳陳伏乞

皇太后

皇上聖鑒訓示施行謹

奏 同治九年正月初八日

請調馬德昭移駐陝境片

再臣於陝境肅清後率師規隴所部各軍北路直逼金積堡中路直達皋蘭南路直臨狄道諸軍西進陝省毗連之地自延榆綏迤東出鄜洛邠長越汧隴而南綿亘千數百里均與甘省唇齒相依尤關後路運道現在金積堡陝回被剿窮蹙糧草缺乏游騎伺虛掠食覲覲東路兵至則去兵去則來飄忽靡定陝西各營或逼賊巢或護運道或搜剿游匪本省兵分力單不敷調撥查甘

肅甘州提督馬德昭所統豫軍駐紮潼關晉溝素稱得力目下豫省防務已鬆臣擬調赴陝西或以全軍移駐或酌帶入成隊伍前來扼紮三原地方居中策應鎮壓陝疆仍可爲豫省屏蔽該軍月餉向由河南支發今既由豫入關嗣後月餉仍應由河南籌解劃抵河南欠解甘肅協餉於事體亦爲允當於時局大有裨益除咨馬德昭並河南撫臣外謹附片具陳伏乞

聖鑒訓示施行謹

奏  
同治九年正月初八日

系系名三  
定邊失守請

飭郭寶昌肅清湘皖兩軍餉道

片

再正拜摺間忽接據署延榆綏道成定康馳報八年十  
二月二十日夜回逆襲陷定邊縣城前壽春鎮總兵蘇  
如松預望城良回馬柏森稟報相同查陝西自甯條梁  
以西安邊定邊花馬池一帶爲劉松山全軍後路餉道  
攸關劉松山進剿靈州臣因餉道堪虞飭金運昌於進  
兵時留營防護嗣金運昌因前敵兵力尙單將甯條梁  
安邊定邊各營調赴金積堡蓋冀郭寶昌馬步三營可

以續進填紮不知郭寶昌時已遭

旨赴晉也自此定邊空虛劉松山金運昌軍餉軍火軍糧皆需派馬步隊前赴寧條梁迎護此次賊乘虛襲陷縣城劉松山金運昌自必派隊馳援然由金積堡靈州至定邊傍河岸迤北而東逾花馬池計程三百數十里往返奔赴兵力過勞而前敵之兵見少現屆春令解凍伊邇山西冬防已將解嚴可否請

旨飭山西撫臣令郭寶昌於水橋銷化後迅率所部馬步三營由綏德馳赴定邊花馬池一帶肅清劉松山金

運昌兩軍餉道俾免後顧之虞伏候

聖鑒訓示施行謹

奏

同治九年正月初八日

軍機大臣 字寄同治九年正月十六日奉

上諭左宗棠稟圖善奏南路官軍擊賊獲勝左宗棠奏中路官軍擊退竄回並定邊縣城失守各摺片覽奏均悉河狄逆回勾結陝回崔三禹得彥等股竄擾禮縣寧遠一帶經傅先宗等疊次截擊擒斬賊匪不下二千餘名餘賊遁回狄道剿辦尙爲得手所有在事出力員弁

勇丁著准其擇尤保奏陣亡游擊杜敬仲守備張白新  
把總周八士均著交部議卹金積堡陝回被剿窮蹙復  
勾引崔禹等逆悉覲北趨勢頗猖獗周紹濂黃鼎等於  
半角城黑城鴉兒灣老虎溝等處前往截剿斃賊三千  
餘名在事員弁勇丁尙屬出力並准左宗棠擇尤保奏  
陣亡之總兵銜副將劉甫田著交部照總兵例從優議  
卹副將邱元章徐廣發王清祿游擊饒開鈞把總黃占  
奎黃安邦均著照所保官階議卹陝回馬鎮和等堅守  
金積堡巢穴屢攻未下該逆被困日久時思勾引各股



逆匪劫糧阻運牽掣官軍並圖一逞現在敗匪雖已遠遁仍恐乘間分竄著左宗棠等督飭南路中路各軍確探賊蹤聯絡截剿使金積堡之賊勢孤援絕方可力圖攻拔陝西自甯條梁至花馬池一帶爲劉松山全軍後路糧運所經何以金運昌遽將留防各營調赴前敵詎不料及逆回詭計多端一經繞截後路全局卽虞掣動現在定邊旣被襲陷糧道設有梗阻關繫匪輕郭寶昌此時協防晉省河岸正當喫緊且所帶新軍人數無多不必令其馳赴定邊著左宗棠派隊馳援並責成劉松

山金運昌迅圖攻克肅清後路一面飛咨陝省防軍合力夾擊以杜賊蹤竄擾其前敵各軍仍當飭令穩慎進攻勿稍鬆勁左宗棠另片奏請調馬德昭帶兵赴陝防剿本日已諭令李鶴年酌量調撥矣將此由六百里各諭令知之欽此

辦結土匪張貴等片

再臣前將土匪張貴率黨乞降道員黃鼎暫赴靜寧點驗降眾分別辦理於上年十月十九日奏報在案嗣據黃鼎稟稱張貴所部降眾大都籍隸平涼鹽固隆靜會

甯各屬逐日點驗查詢籍隸靜甯莊浪有家可歸者五百餘名資遣各歸各籍交鄉約管束其籍隸平涼固原隆德會甯者多因遭亂無家可歸交平涼府擇地安插此外尚有川湖淮豫人從軍被夷者二百餘名餘皆鹽茶廳人年力精壯回籍無以謀生恐仍流而爲匪當挑補該軍新捷四營勇夫以資鈴束又挑膽壯戰馬一百二十五匹附入該軍馬隊而中路匪案始結臣維張貴卽剛入本鹽茶廳民人粗蠢而有膂力始藉報復仇爲名糾聚不過數十人嗣因年荒糧貴各處匪徒從而

附和遂至嘯聚萬餘居然置械立幟號稱義旅不肖官紳始圖倚其勢以自衛繼且假其勢以擾民爲之勒兵費派軍糧有不應者破其堡寨擄其婦女甚至非刑拷掠搶殺焚燒利所有而食其餘所爲殆無人理其黨之最兇惡者爲僞統領侯得應僞營哨官王璧柳林張起運樊耀青楊寶山趙銀秀柴滿桂張雄碓子楊潤安王魁楊兆魁等張貴就撫之後諸兇仍散匿各處迭經各營及各地地方官設法撈拿始將元惡侯得應王璧及各犯一律獲到先後押解臣營臣逐一提犯嚴訊該犯等

罪狀實浮於張貴質之本地士民無不異口同聲其王  
璧一犯曾署隆德營外委而破隆德縣城戕害守備王  
萬順一家四口者卽該犯也訊畢將候得應王璧凌遲  
處死以申

國法而洩民憤其柳林等概予斬梟惟張貴一犯暫尙  
留黃鼎營勒捕餘匪且聽其獲犯自贖所有辦結中路  
匪案緣由謹據實附片陳明伏乞

聖鑒訓示謹

奏  
同治九年正月初八日

北路官軍進剿疊勝摺

奏爲北路官軍進剿逆回攻破塞壘疊獲勝仗據實馳  
陳仰祈

聖鑒事竊陝回逆目陳林馬鎮和余彥祿等折竄金積  
堡自上年十一月十三日迭經官軍痛創併入金積東  
西各堡與甘回雜居勢甚衰蹙續准劉松山牘稱該逆  
於十一月十四日夜仍就波浪渠堰修築長牆一道較  
前更堅十五夜二鼓調賊出金積堡西北馬家灘回寨  
運取馬草劉松山乘月掩襲分枝循東北進波浪渠長

牆直搗賊巢自督馬步疾馳提督金運昌營前合隊四鼓逆眾甫護牲畜出西北劉松山金運昌會商以步軍列隊居後伺窺賊出相機應之馬隊張左右翼一趨西路一趨北路賊見官軍大至駭而奔馬隊馳出賊後邀其歸路忽金積堡東西兩面角聲四起援賊驟至金運昌步隊迺西斜出劉松山步隊分三路排列正西一面嚴陣以待步賊且前且却正相持間官軍馬隊已敗賊於秦塢關從步軍陣後抄出賊之左右劉松山擂鼓急進各路猛力薄之鎗礮雷轟刀矛如牆而進斃馬步悍

賊甚夥賊勢披靡向金積堡以西各寨狂遁官軍馬步  
緊蹙至寨根敗賊有奔入寨內者有進寨不及越金積  
堡濠內逸出者其東北一路又經提督蕭章開道員劉  
鋤棠督隊環攻賊尙憑長牆拚拒劉松山金運昌分馬  
隊繞出卡後該逆返顧慌亂蕭章開劉錦棠催隊將長  
牆一鼓蕩平乘勝逐北追近金積堡東西各寨收隊是  
役東西兩路共斃賊千餘名劉松山所部生擒一百八  
十餘名訊出賊日馬芝堂馬三揚李翔三名一併正法  
奪獲騾馬五百餘匹拾器械無算弁勇受傷九十五名



內記名提督楊清源胸膛受擡鎗子傷甚重陣亡弁勇  
十七名此十一月十六日劉松山會合金運昌各軍擊  
敗陝回攻破賊卡獲勝情形也十七日金運昌移營壓  
金積堡西北而壘斷該逆往來馬家灘之路馬家灘一  
帶向有本地回寨自官軍由固原掃蕩而北預望城李  
望堡一帶被創甘回多竄匿其中皆馬化澂新教死黨  
也二十七日黎明劉松山會師進剿金運昌列隊於南  
劉松山列隊於西分枝迤西而東南金積堡東面步賊  
循牆出西北二三里各村莊憑礮臺抗拒馬賊則由正

西馳突而來提督余虎恩潘運璋周雲祥彭緒忻朱德  
開都司陳宗蕃副都統雙壽馬步猛擊之馬賊卽敗退  
步賊之後蕭章開劉錦棠從左右路猛進劉松山督中  
軍繼之乘勢壓下立將各莊礮臺一律踏平右路敗賊  
跳匿莊內近二百名經蕭章開圍殺無遺餘賊敗至波  
浪渠南西風起塵沙眯目乃收隊是役總計斃賊七八  
百名劉松山一軍生擒八十八名內賊目金虎馬沅哈  
桂清訊明均經正法奪戰馬二百數十匹器械多件官  
軍弁勇陣亡十八名受傷一百零四名此十一月二十

七日劉松山會合金運昌各軍進剿陝回獲勝情形也  
二十九日黎明劉松山押牲畜赴河西運薪芻自督馬  
步督築新壘金積堡東逆眾傾巢突出劉松山金運昌  
擊敗之斃賊三四百名三十夜逆賊又傍金積堡西北  
里計加修土壘兩座附築礮牆密開礮眼意似屏蔽賊  
巢十二月初一日黎明金運昌馬步向西南進劉松山  
馬步向東南進金積堡步賊出西北一二里憑依礮牆  
抗拒馬賊向正西衝突劉松山步隊分三大枝迎敵馬  
軍直趨正西提督曾松明軍功李雙良飛馬突陣壯士

繼之悍賊紛紛墜馬向正南敗走步軍迤東而北直逼礮牆賊憑牆穩抗官軍噴筒火箭環施夾劈山礮洋鎗測準轟擊賊中損折極多兇鋒大挫各營乘機撲之登時將礮牆踏毀賊敗向西北傍壘回拒瞥見官軍馬隊環繞兩旁恐斷歸路狂奔金積堡西面各寨壘賊見陣賊鼠竄回巢亦棄壘飛遁兩壘一鼓下之各軍分道躡至金積堡外濠而旋是役共計斃悍賊六七百有奇劉松山所部生擒百一十餘名訊畢斬於軍前奪獲戰馬器械甚夥弁勇受傷一百三十二名陣亡二十五名此

十一月三十日十二月初一日劉松山會合金運昌進剿陝回攻破賊壘獲勝情形也初六夜陝回馬步千餘出金積堡東南排列提督李雲貴營前一里許意圖出巢掠食經李雲貴董福祥各營擊敗南遁初七日午刻劉松山擒獲賊探供稱該逆越羊馬湖迤西而東出胡家堡向甘回王洪楊明兩寨索糧步賊尙屯胡家堡東南各村莊馬賊踞正東二三里距金積堡約四十餘里劉松山約金運昌整隊進擊初八日五鼓行抵胡家堡里許金運昌進右路劉松山進左路北近賊巢步賊登

時驚潰官軍分途掩殺斬馘無數馬賊聞號破聲由東面折遁西北沿黃河向馬家灘逸去初六夜及初八日之戰共斃賊六七百名斬逆目馬連一名劉松山所部奪牲畜二百餘頭器械數百件弁勇陣亡七名受傷三十八名此劉松山會合金運昌連日截剿陝回獲勝之情形也陝回與甘回向以同類不相殘害自陝回索糧於胡家堡未得又怨其引官軍剿之也於是陝回陳林等復喉李旺堡馬家灘早元堡等處甘回於十一夜傍黃河出西北麕集胡家堡以南向甘回馬宏芝馬雄等

通勒糧食佔踞四五寨劉松山偵知約金運昌合擊之  
十二夜潛師疾起天明抵胡家堡各寨踞逆馬步三千  
餘眾蜂出金運昌擊其右劉錦棠攻其左劉松山督中  
軍相機策應併力壓下賊敗歸巢各路馬步乘勝猛撲  
躍躍衝入馬家寨賊三百餘名盡殲無一脫者是役各  
路斃賊七百有奇劉松山一軍生擒六十餘名奪戰馬  
三百餘匹器械多件勇丁陣亡十六名受傷八十四名  
此十二月十三日劉松山會金運昌馳剿竄回攻破堅  
寨獲勝情形也陝回屢敗之餘不能分踞各寨盡附金

積堡壕內外支帳列居逆脊鑷錯其間外砌長牆以資  
屏蔽其原踞各寨馬化潯喊金積堡附近廿回踞之十  
九夜三鼓金運昌率隊向金積堡西門進劉錦棠率隊  
向金積堡東門進劉松山出中路策應兩軍比近賊巢  
賊驚覺依牆列隊各營鎗礮雷轟噴筒火箭齊發延燒  
賊帳壯士踰牆而上見賊卽砍賊敗遁壕內官軍正分  
途掩殺間各寨甘回突出救援圖抄官軍之後陶定昇  
易致中何作霖分兩路橫擊之援賊不支敗遁原巢官  
軍壓追寨邊守寨之賊閉門拒之敗賊不得入循牆而



通壕內甘回恐官軍乘勢擁入立將卡橋折斷陝回之  
墮陷壕中刺斃跌斃者無算是役斃悍賊共五六百名  
賊脊傷夷者無數可計劉松山所部生擒一百零七名  
分別斬釋奪獲騾驢馬三百餘頭拾器械甚夥弁勇陣  
亡七名受傷三十二名此十二月十九夜劉松山會合  
金運昌攻破陝回牆壘擊敗甘回獲勝之情形也劉松  
山回營後令軍士備雲梯草束爲進攻之具二十一日  
黎明督隊抵胡家堡地方各寨步賊憑牆堡列隊馬賊  
分兩路衝來易致中何作霖張左右翼迎敵立斃悍騎

多名馬賊縮退步賊兩旁官軍三路乘之馬賊狂遁西  
南比賊敗歸原寨入寨不及之賊各營四面抄殺無遺  
是役斃賊三四百名生擒四十三名訊明斬之官軍弁  
勇陣亡十一名受傷六十四名薄暮收隊距胡家寨二  
三里安營其毗連胡家堡爲趙馬兩寨賊刃林立二十  
二日四鼓劉松山夜襲之督隊分數路環攻正在擲草  
填壕揮鋤湧進南西各寨步賊忽從趙家寨之左抄出  
劉松山督各營截擊援賊敗退追逐里許適趙家寨中  
積薪爲官軍火箭所著煙燄騰空寨賊驚怖弁勇探升

而上拔之寨內踞賊焚殺殆盡各營捲旗休息更漏將殘矣其馬家寨之賊見官軍已破趙家寨分兵合圍無路可遁亦無援可待堅壁拒守二十三日辰刻軍士更番輪攻逾時之久寨中子藥磚石已盡各營乘機猛撲相繼而下兩戰斃賊七百餘名陣斬逆目馬世傳於趙家寨生擒逆目何彪於馬家寨訊明正法奪獲騾驢戰馬二百數十匹拾鎗礮刀矛六百餘件并勇陣亡二十六名受傷一百三十二名此二十一二三等日劉松山一軍攻破趙馬兩賊寨獲勝情形也官軍收隊回金積

堡銅陝回頭目鄒保和夥甘回逆黨由韋州一帶據糧而歸距金積堡東南三十餘里二十五夜劉松山約總兵張福齊徐文秀諸軍併力攔截漏二下賊由漢伯湖踏水而過不虞官軍已分三路伏堡以待也劉松山擂鼓發號催隊迎頭擊之該逆拋棄輜糧頓蹙水中餘賊由張福齊徐文秀兩軍中空之地北竄經各營攔截而東五鼓繞波浪湖出西北趨金積堡方近板橋劉松山派提督尹興茂清運璋截剿而前敗賊鮮有漏網總計此股竄賊馬步六七百名除官軍擒斬衝散之外歸巢

者不過數十名牲畜糧食器械俱爲官軍所奪弁勇受  
傷八名此二十五夜劉松山會徐文秀張福齊諸軍迎  
剿東西竄賊獲勝情形也其金運昌會剿詳細情形及  
雷正綰周蘭亭張福齊徐文秀各軍迭次戰狀另片詳  
陳以清眉目所有劉松山一軍前後各戰陣亡記名提  
督張四維提督銜總兵文官勝記名總兵劉上達陳尊  
榮劉世福總兵銜儘先推補副將熊得佑補用副將陳  
起禮周連勝補用參將李壽其補用游擊袁勝義李鏡  
輝湯棟安游擊銜補用都司曾啟輝補用都司彭恒貴

董萬福拔補守備陳世真章友德符楚南張俊臣拔補  
把總熊德新廖廷雲毛信成林家聲均係衝鋒陷陣血  
戰捐軀應懇

天恩飭部各照所保官階議給

卹典以慰忠魂所有劉松山各軍進剿逆回攻破寨壘  
迭獲勝仗實在情形謹會同幫辦陝甘軍務署陝西撫  
臣劉典恭摺馳報再自上年十二月初旬以後西路援  
賊踵至平涼固原以北至寧靈一帶連道中梗其間土  
回亦有撫而復叛者兵事繁雜各軍所報戰狀緘牘又

往往中途沉失須飭從新補齋始可據以入

告而彼此補齋或遲或速未能剋期並到故此次馳報

捷狀致有稽遲合併聲明伏乞

皇太后

皇上聖鑒訓示施行謹

奏

同治九年正月二十二日

雷正綰等堵剿獲勝片

再陝西提督雷正綰題奏提督周蘭亭提督銜記名總  
兵張福齊各軍上年十一月十三日以前戰事原已於

十一月三十日馳報續准雷正綰等緘稱逆回勢窮圖竄十三四至十七八等日各軍連日堵剿獲勝其文報中途遺失未據補齎續據續稱十二月初一日辰刻劉松山約會出隊雷正綰馬步向金積堡西門進周蘭亭張福齊繼之賊大股自西面分道迎敵騎賊列步隊兩旁分枝伏左右廢堡中意圖抄官軍之後維時官軍已直抵二道渠賊紛紛越渠索戰提督閻定邦總兵陳義趙玉亭前總兵徐萬福副將黃有本楊美勝隊伍一鼓壓下躡追過渠賊伏起雷正綰周蘭亭張福齊調劈山



賊隊排轟之賊遁歸巢各營正連環收隊騎賊復糾悍  
黨衝突而來總兵劉明泰周玉堂參將劉忠發知州黃  
立釐同旗猛撲逼賊入壕內乘勢將各堡伏賊搜殺而  
還是役其斃賊五六百名生擒數十名分別斬釋奪獲  
戰馬器械甚夥官軍弁勇畧有傷亡此十二月初一日  
雷正綰周蘭亭張福齊各軍會剿逆回獲勝之情形也  
初六日黎明各軍整隊分三路衝進二道渠扼賊於西  
南各堡斬斃多名日暮收隊聞東南鎗礮聲張福齊周  
蘭亭料賊圖南竄亟挑銳卒乘黑夜踏冰越油蔴湖馳

抵漢伯堡竄賊正狂奔而南官軍截其後股掩殺二百餘名獲牲畜二百餘頭是夜二鼓賊騎步數百竄近高州鎮總兵徐文秀營前搶越長壕各營迎頭堵截格殺十餘名奪騾馬數十匹該逆奪路而遁初七日賊乘冰橋偷越廣武營雷正綰等派隊雕剿斃賊多名賊逸而西趨副將楊光龍率隊由張恩堡截出行三十里至鐵桶堡斬殿後悍賊百數十名初八九等日閤定邦周玉堂黃立鼐隊伍出廣武護糧沿途遇賊或數十人一起或百餘人一起官軍均有擒斬此雷正綰周蘭亭張福

齊徐文秀各軍連日截剿賊回獲勝之情形也十六夜二鼓逆眾由漢伯堡轉糧金積堡總兵陳玉貴徐萬福黃有本潛師襲之前截後追斃賊數十名獲其輜糧騾馬而歸十七夜漏初下周蘭亭張福齊誦賊騎千餘出金積堡履冰越油蔴湖圖分竄東南刦糧官軍預伏湖岸以待比賊近岸轟斃刺斃極多餘逆敗遁回巢生擒八名奪騾馬四十餘頭糧袋百餘條周蘭亭張福齊料該逆連夜負創必以官軍巡防在外將乘虛犯營十入夜軍中嚴守備各選壯士伏壕內俟賊至營前乃起

擊之二鼓該逆大股直撲張福齊營壘踰長壕拔花籬  
勢甚兇猛張福齊周蘭亭擂鼓發號督所部分左右路  
抄出壕內伏兵齊起應之該逆狂奔回巢是役殺斃賊  
數百名生擒十二名訊明斬之奪獲騾馬四十餘頭糧  
袋百餘條乾糧二百餘斤十九夜三鼓張福齊誦賊由  
楊家團莊踰漢伯堡入金積堡麾隊掩之殲斃無數餘  
逆折回楊家團莊官軍四鼓收隊奪騾馬八頭雜糧百  
餘斤口袋三十餘條是夜二鼓該逆數百騎過油蔴湖  
徐文秀派各營迎擊之斃賊二十餘名奪騾馬數十頭

勇丁受傷三名陣亡一名此十六七八九夜張福齊周  
蘭亭徐文秀各軍截剿竄回獲勝之情形也二十四夜  
三鼓賊仍向油蔴湖偷渡徐文秀率隊截轉生擒七名  
二十五日逆眾由定邊據糧進預望韋州回金積堡各  
路官軍得報同時準備三鼓賊越漢伯堡經劉松山督  
隊擊敗趨油蔴湖北遁徐文秀所部斃賊數十名該逆  
仍折而東是役徐文秀所部斃賊數十名生擒九名奪  
其牲畜糧食據擒賊供此股即陝回鄒保和所帶經官  
軍截擊落後茲圖歸巢訖畢斬之徐文秀於二十六夜

分佈防兵於油蔴湖三鼓賊至官軍併力攔截轟斃數十名生擒十七名餘逆仍向東竄其經金積堡迎護之賊又經劉松山擊敗歸巢二十七夜三鼓金積堡復出悍騎駛油蔴湖東絳徐文秀橫截之將逆眾截成兩斷此二十四五六七等日徐文秀各營截剿竄回獲勝之情形也除俟各軍續報到營再行馳

奏外所有雷正綰周蘭亭張福齊徐文秀各軍堵剿逆獮疊獲勝仗實在情形謹附片具

奏伏乞

聖鑒訓示施行謹

奏 同治九年正月二十二日

金運昌會剿獲勝片

再記名提督金運昌所部馳抵金積堡地方與劉松山會師剿賊所有上年十一二月節次獲勝情形臣已准劉松山來牘陳

奏惟未據金運昌稟稱故戰狀不詳嗣迭據金運昌稟稱該軍將定邊花馬池運道部署節節分營駐守卽自率馬步各營於十月二十四日馳抵靈州築壘於城西

南十餘里比因回逆正向劉松山乞撫連日按兵未動  
十一月初三日辰刻劉松山以陝回人眾心雜撫議無  
成約齊隊痛剿當率所部成列以出與金運昌會師吳  
忠堡午刻齊抵板橋瞭見賊中馬步出金積堡附近堡  
寨列隊抗拒劉松山分三大枝攻其東北金運昌向金  
積堡之西擊賊右路總兵銜副將王化成副將邵升堂  
步隊列右路之左提督方廷芝參將董布亮步隊列右  
路之右金運昌督提督銜總兵張懷玉參將邵維常居  
中策應提督王鳳鳴總兵李華文馬隊出步隊左右兩



路之旁稍取遠勢以作包抄賊見官軍新樹一幟隊伍  
不及劉松山之多悉銳以欺其單官軍以洋鎗洋礮三  
路排轟刀矛手連環湧進斃悍賊數十名賊陣慌亂王  
鳳鳴李華文等縱馬抄殺步兵繼之逼近金積堡壕邊  
蕩平賊巢十餘處薄暮收隊卽於金積正北迤西四里  
與劉松山聯絡爲營初四日巳刻金積堡東西兩面塵  
氛大起偵賊傾巢而出欲與官軍決死戰也劉松山攻  
其左金運昌仍攻其右先以馬隊誘戰佯爲不勝伺步  
賊離巢漸遠金運昌揮隊奮擊李華文王化成馬步從

右路之左殺出王鳳鳴方廷芝馬步從右路之右殺出賊大清遁入西南各巢落後之賊斬馘殆盡少得免者各收隊還兩日之戰金運昌一軍斃賊近千生擒百數十名奪獲戰馬三百餘匹弁勇受傷一百九十二名參將張兆孟左膀受矛傷陣亡四十四名此十一月初三四日金運昌會劉松山剿回獲勝之情形也連日大風揚沙賊伏未動初七日劉松山會商仍分兩路出隊金運昌一軍斃賊二百餘名生擒三十餘名奪獲戰馬四十餘匹勇丁陣亡九名受傷四十二名初八日黎明劉

松山移軍金積堡正北里許築壘金運昌列隊助之賊出馬步來撲官軍嚴陣抵禦午後營壘成軍士分途壓剿斃賊約二百名生擒十餘奪戰馬二十餘匹勇丁陣亡八名受傷三十名初九日劉松山會金運昌隊伍進金積堡之西回逆亦分股索戰馬賊迤西而北圍繞官軍之後金運昌派王鳳鳴領馬軍禦之輔以步隊洋鎗手自督大枝馬步合劉松山右路之兵將東路悍賊奮力擊敗轉旆而西策應王鳳鳴一路其時西北馬賊猶將下馬步戰軍士以全勝之勢膽氣益雄超距而前當

者辟易博擊逾時賊紛紛上馬飛騎狂遁官軍斬其殿  
後悍賊多名壓追金積堡西面寨外而還是役斃賊三  
四百名受鎗礮傷者約六七百名生擒七十餘名獲戰  
馬百餘匹器械五百餘件勇丁陣亡三十二名受傷百  
四十名總兵郭占榮躍馬當先面被矛刺手中礮傷副  
將李占標驍勇突陣左肱受矛傷穿透左股中飛礮子  
此十一月初七八九日金運昌會劉松山剿回獲勝之  
情形也是日以後至十六日金運昌一軍捷狀臣已於  
劉松山摺內兩次畧陳大概其稟報尙未到營想係郵

遞遺失已飭補齎前來再行詳報嗣金運昌以賊勢蹙而仍悍迭次交鋒騎賊慣用步戰與官軍短兵相接所部步隊伍營扼駐正北而金積堡西門一路該逆尙能出入樵採因將甯條梁安邊定邊各營移赴前敵以厚兵力分屯金積堡西北而壘二十七日黎明金運昌馬步出正南與劉松山西路隊伍互爲犄角王鳳鳴馬軍迤南而東以分東路賊勢金運昌揮隊向南猛進賊千餘悍黨迎敵張黨玉王化成方廷芝三面抄擊之該逆敗遁西路王鳳鳴隊伍自東緊躡其後劉松山隊伍自

西攔截於前敗賊冒死趨波浪渠見官軍因風勢漸緊  
按隊未追忽憑渠抗拒相持許久風漸定邵升堂挑壯  
士數十名挺長矛從左路越渠猛刺賊驚潰右路之賊  
亦經劉松山擊敗各路躡近賊巢始行收隊二十九日  
金運昌步隊列營壘左右挑戰賊堅壁未出已刻金運  
昌聞南路礮轟雷震知劉松山已出隊擊賊矣督馬勇  
疾馳東路夾道衝出賊駭而奔官軍分道躡之斬馘甚  
夥初一日劉松山會金運昌仍分東西兩路擊賊金運  
昌見賊之精悍麇聚於西東面賊勢稍弱分小枝隊伍

牽綴之挑馬步大隊併力與劉松山全部排山而進將西面賊壘礮臺一律踏毀殺至金積外壕而還二十七二十九至初一日三次之戰金運昌一軍斃賊八九百名生擒百餘名奪獲戰馬八十餘匹軍械百十餘件勇丁陣亡二十名受傷五十六名二十七日之戰邵升堂身先士卒奮勵無前左股受矛傷此金運昌會劉松山連日剿回獲勝情形也陣亡之游擊朱鳳章都司劉振邦守備孟繼聲均係血戰捐軀應懇

天恩飭部各照所保官階議給

卹典以慰忠魂除金運昌一軍戰狀俟接詳細續報再行馳

奏外所有金運昌上年十一月初三四七八九及二十七二十九十二月初一等日會合劉松山剿回獲勝情形謹附片馳陳伏乞

聖鑒施行謹

奏同治九年正月二十二日

軍機大臣 字寄同治九年正月三十日奉

上諭左宗棠奏彙報北路官軍剿賊疊勝暨金運昌雷



正綰等軍獲勝情形各摺片陝回逆目陳林等折竄金積堡負嵎抗拒經劉松山會合金運昌等軍於上年十一月十二月間疊次獲勝攻破泰壘賊鋒大挫著左宗棠嚴飭劉松山會同各軍將該逆悉數殄除毋任漏網所有劉松山軍力戰陣亡之提督張四維提督銜總兵文官勝總兵劉上達陳尊榮劉世福總兵銜儘先推補副將熊得佑副將陳起禮周連勝叅將李壽其游擊袁勝義李鏡輝湯棣安游擊銜都司曾啟輝都司彭恒貴董萬福守備陳世真章友德符楚南張俊臣把總熊得

新廖廷雲毛信成林家聲並金運昌軍陣亡之游擊朱鳳章都司劉振邦守備孟繼聲均著交部各照所保官階議卹金運昌雷正綰等軍均係會攻金積堡之師現在逆回乘虛肆擾陝境著左宗棠嚴飭該員等將金積堡賊匪迅速掃除以便分兵追剿毋爲該逆牽掣將此由六百里諭令知之欽此

請 飭部頒發湖北牙釐章程並頒給部帖片再臣前派周開錫總統甘南諸軍兵事飭令認真整頓以裨大局茲據稟稱改秦州厘局爲甘南稅厘總

局仿照湘鄂閩浙各省成法酌以本地情形核實經理現計收入之數較前增倍惟牙帖一項向由地方官轉呈藩司衙門照例頒發每歲歸稅藩庫而額數甚微弊竇實大今擬仿照鄂章市鎮分繁盛偏僻帖分上下三等提入稅釐局舉辦商民請帖者均由局按章給領以歸實在臣查周開錫曾隨同前湖北撫臣胡林翼辦理軍餉於牙釐事務最爲熟悉現在統軍甘南稅釐已漸有起色若將牙帖併歸局辦無論牲畜土產佑販百貨各項牙帖均可湊集成款卽於鹽帖爲一大宗將來花

馬池等處之監令民間請帖行銷足以開餉源而濟軍用除飭周開錫安籌試辦外相應請

旨飭部將湖北牙釐章程鈔發並頒給部帖以便因地制宜變通盡利謹附片具陳伏乞

聖鑒訓示謹

奏

同治九年正月二十二日

軍機大臣奉

旨戶部議奏欽此

拏辦逆匪張維並陳日新革職留營片

再前據署平慶涇道魏光燾稟稱奉前督臣穆圖善札  
開同治七年五月十四日奉

上諭林壽圖奏平涼失陷游擊李承萬遇害知縣陳日  
新並未殉難據稟出城彈壓且千總張維有通匪情事  
又風聞陳日新與張維有私分餉銀與之齟齬等語棄  
城通賊罪名均重虛實均應徹底根究以肅紀綱著穆  
圖善按照林壽圖所陳情節遴委妥員確切查明嚴參  
懲辦等因欽此欽遵飭查稟覆臣於魏光燾未稟請查  
辦之先據署固原提標平涼營游擊李開化代理平涼

縣知縣陳日新會稟平涼營千總張維派赴後路糧臺  
請領餉銀一千兩該千總回營僅交銀七百餘兩餘均  
匿不繳出署游擊李承萬勒令如數全繳加以笞責張  
維心懷忿恨時匪目蘇存鴻正盤踞平涼北原張維遂  
勾引蘇存鴻詐稱回逆於七年四月二十五夜率黨由  
城東缺口入城登時將游擊李承萬戕害並戕哨官林  
世忠孟宗孔旋即出城代理平涼縣知縣陳日新聞信  
赴援則已無及張維蘇存鴻戕官後投入上匪張貴股  
內希圖漏網現將張維設法拿獲徑解提臣雷正綰行

營臣當咨提前署平涼縣千總張維到營親訊各情供  
認不諱並令與陳日新面質陳日新實無私分餉銀與  
之齟齬情事比卽將該犯張維盡法懲處梟首平涼並  
通飭嚴拿蘇存鴻獲案懲辦嗣於上年十一月初六日  
經駐固原州提督丁賢發將蘇存鴻拿獲解營臣查該  
逆以固原積年巨匪屢撫屢叛兇狡異常茲復與張維  
勾結陰城戕官罪大惡極訊明後卽凌遲處死以申  
國憲而快人心平涼城垣空濶城內一片瓦礫陳日新  
僑寓城西破屋中賊由城東缺口潛入戕官比陳日新

聞警由城西馳往則賊已出城陳曰新並無棄城先遁之事嗣設法拿獲要犯張維面與質訊亦委無私分讎齟各情惟城池被匪闖入營官被戕究有應得之咎可否請

旨將花翎補缺後以直隸州知州用留甘補用知縣代理平涼縣陳曰新革職留營效力以觀後效之處出自天恩除咨覆前署督臣穆圖善外謹附片陳明伏乞

聖鑒訓示施行謹

奏

同治九年正月二十二日



軍機大臣奉

旨著照所請該部知道欽此

賊蹤紛竄現籌剿辦並自請嚴議摺

奏爲賊踪紛竄官軍分道馳剿現籌剿辦情形恭摺馳  
報仰祈

聖鑒事竊金積堡逆回經諸軍迭次痛剿勢極衰蹙逆  
回計無所出惟恃勾引援賊阻截官軍糧運冀解重圍  
以爲救死之計上臘崔三禹得彥馬生彥白彥虎諸逆  
由狄道北援金積堡迭經官軍痛剿死傷極多狼狽歸  
巢馬化澂猶不知也怪崔逆等久不赴援又遣其同教  
靖遠馬龔子虎偏賴子等夾其妻弟臨洮大師謝四及

崔山等急赴金積之援上臘二十八日西山各良回報  
河州大股逆回步騎數千突至西安州一帶臣飛飭半  
角城黑城子李旺堡固原州瓦亭各營嚴防一面調陝  
安道黃鼎率所部馬步各營剿之正月初四日黃鼎率  
各營自瓦亭進駐固原州初八日賊騎竄由黑城半角  
城中間山徑出大路撲犯記名提督丁賢發營壘丁  
發飛飭右營副將楊正華由高崖山邊截剿自率親兵  
從大路迎頭截擊賊欺官軍隊伍甚單三路擁出峽口  
悉力來撲丁賢發率親兵力戰穿入賊陣縱橫蕩決賊

不能當斂眾退入石峽口丁賢發令楊正華參將伍慶雲游擊黃義勝守備銜千總張玉樑把總張文元劉學明等從左右縱擊之賊陣遂亂一紅衣逆酋挺矛縱馬而來嗾諸賊轉鬪丁賢發策馬馳及立將逆酋刺傷而奪其馬賊眾擁逆酋向石峽口而去石峽口山徑仄狹騎賊能魚貫不能雁行丁賢發飭排開鎗礮轟之賊死傷相繼棄馬上山弁勇爭先奪擊鏖戰至酉刻始收隊還營是役以寡擊眾以步敵騎斃賊數百生擒悍賊四十餘名戰馬二百餘匹騾馬二三百頭並該逆所進馬

化澄黃帽藏棗等物而官軍陣亡者六十九名受傷者九十五名蓋亦血戰矣據生擒賊供該逆圍繞東山向預望城韋州以竄金積堡比黃鼎護運各營趕到則賊已遠遁乃飛報金積堡各軍嚴密戒備以待其由金積堡竄出環慶一路擾截糧運者約有兩大支頭起爲甘回馬升明陝回海萬新等二起爲陝回藍明泰馬正剛等漢回雜湊計人馬約二千內外號稱四五千上臘十七日賊騎百餘攻環縣之大柴溝民堡副將蕭玉元救之十八日遇賊大柴溝南二十餘里蕭玉元麾隊迎擊

追近大柴溝殺賊數十奪獲馬十餘匹生擒回逆劉有  
明馬明連訛供係上臘初五日由金積堡竄出之賊小  
頭目爲陝回劉得元二十一日復探各股麇至環縣之  
二十里鋪是夜四鼓蕭玉元率親兵及前左兩哨列於  
河下知縣羅壽昌率右後兩哨由山上壓剿而下蕭玉  
元望見山上之隊齊抵山梁麾隊急進殺賊十餘名賊  
卽卻退羅壽昌率山上之隊馳擊而下彼此會合猛進  
斃賊五百餘名生擒三十五名奪驟馬百餘匹訛據生  
賊供甘回頭目馬升明陝回頭目劉得元海萬新均經

陣斬矣二十六日戌刻訶縣境馬房川又有賊踪羅壽  
昌等馳至賊卽上山逃遁蹤踪追殺二十餘名餘賊乞  
降羅壽昌驗其器械衣服或有或無挾之以歸訊知卽  
前次擊敗餘賊也內有逆回二十一名斬之而馬升明  
海萬新等一支已紛紛散竄不復成股矣其餘黨之無  
歸者仍結夥分途四竄十二月二十九日署慶陽府知  
府謝大舒調郡北東川地方有賊竄至商之署慶陽營  
游擊李奪魁挑選留防勇丁及親兵團勇其一百三十  
名伏於賈家橋適報騎賊已抵旋馬灣相距僅十五里

李奪魁急進掩之初一口辰刻馳抵月樂地方擬保花翎守備張金明參將宋南山千總程炳順先以三騎誘賊賊千餘競起逐之忽李奪魁督隊齊至立刃十餘賊各密洞賊蜂擁而出李奪魁背山據險整隊奪擊賊多死傷一黃襖賊目中鎗而斃賊勢大潰李奪魁追擊十餘里至潞池掌柔連川賊遠遁黃頂山始收隊而還計斃賊百餘名奪騾馬驢三十餘頭矛桿二十餘件是時合道川一帶警報頻傳初二日蕭王元出隊本鉢坑遇賊騎數百突至其地寬平如掌無險可阨乃結方陣禦



之相持三時不決賊騎亦不敢近進薄暮收隊而回是夜蕭玉元羅壽昌分三路設伏於張家灣合道城河及川西各處三更賊果大至五品軍功鄧紹禹於賊騎過半時橫截而出鎗礮分列排擊昏黑之中賊不辨官軍多少後股騎賊向東北奔竄前股千餘爲合道城河及川西伏兵截住各弁勇奮力衝殺將賊截爲兩槩黎明賊紛向合道城河下竄官軍奮威衝殺斃賊人馬二百有餘生擒三十八名敗賊向安家掌一路飛遁初三日追剿上竄之賊至環縣探賊由肅遠溝竄去其下竄之

賊亦由毛家溝竄去初五日李奪魁商同總兵戴佑勝  
參將宋南山易谷方張金明等率勇丁二百人趨東川  
邀擊之行抵白家甸訓知賊竄過迤東十里住窩洞十  
餘處初六日寅刻分三路進攻賊甫驚覺恟懼思遁官  
軍急擊之斬賊數十其前數寨之賊百餘名策馬翻身  
而竄官軍躡踪窮追二十里沿途均有擒斬計共斃賊  
百餘名生擒十三名署平慶涇道魏光燾所留鎮原之  
剿竄匪之總兵夏奉朝及提督甘大有連日於鎮原之  
張高鎮計家大岔鎮原固原交界之海巴子川一帶搜

剿竄逆計其斃賊約近百名生擒十四名奪獲騾馬六十餘匹初六日魏光燾馳回慶陽接據各路稟報合道川截斷一支北竄之賊又將下竄而白家甸擊敗之賊已由合水酈州交界之蒿水舖竄向固城當卽飛緘提督劉端冕所部前後兩營分途兜剿飭參將魏紀鑒率隊由西華池南義井向寧州正寧一帶截之初九卯刻夏奉朝赴慶陽一面派馬勇赴黑水河一帶偵探中途遇逆回十餘當卽追殺生擒五名奪獲騾馬七匹訊知陝回馬正剛帶陳瞎子馬祥順沙學德等賊黨二千餘

由金積堡竄至惠安堡掠取食鹽遣千餘賊裹送金積堡自帶千餘人由惠安堡葦州堡下馬關預望城毛居士井三岔河而來騎賊因馬倒落後者多初八日三更由三岔河竄西峯鎮蕭金鎮幫帶馬隊參將譚吉士訊知前情未刻率隊追至蕭金鎮當卽飛隊攻擊立斃悍賊十餘名奪騾馬數十騎賊四路衝至將馬隊圍住譚吉士督隊衝殺突圍而出仍回關十餘合賊始敗退計陣亡馬勇三名受傷八名初十日夏奉朝回營十一日率隊追至蕭金鎮賊已於是日竄甯州十二日拔隊甯

州則賊已由正甯竄入陝境三水矣其竄陝以後情形  
已由署撫臣馳報竊維由金積堡竄陝之賊定邊甯條  
梁竄入者據各路馳報數約三千由環慶竄入者兩支  
約二千餘環縣慶陽各營初八日以前所剿敗者其前  
股也人飢馬乏遇官軍則敗現已掃滅殆盡陝回馬正  
剛一股稍悍前竄入陝境者實不滿千頃據魏光燾稟  
十一夜溫橋夜襲賊館斃賊二十名生擒十二名無一  
脫者十七日太平鎮擊逆目藍明泰一起斬殺四十餘  
名生擒四名餘賊向三岔河遁去當卽馬正剛之黨未

能合隊者

臣

聞馬正剛一股將闌入陝境十四日卽調

漢中鎮總兵李輝武駐寶雞兩營赴乾州限於十九日到乾派總兵殷華廷率精騎百名輔之將以扼口子頭之要也嗣賊已由口子頭竄出復飭李輝武續調兩營繼進而飭周開錫以吳士邁宗岳兩營填紮其壘李輝武殷華廷馬步皆能戰檄歸署撫

臣

就近調遣自可得

力惟延綏一帶兵力甚單前奏請

飭山西撫

臣

於冰橋消化後催令郭寶昌渡河而西肅

清劉松山金運昌兩軍餉道如蒙

俞允庶於大局有裨至臣統籌全局未能先事預防致  
逆回得乘隙入陝擾及完善咎無可辭應請

旨將臣交部嚴加議處以明軍律伏候

皇太后

皇上聖鑒謹

奏同治九年正月二十二日

請飭定安等撥濟劉松山等軍食片

再劉松山一軍軍糧由花定運解程途千數百里已不  
免梗阻之虞況現在回氛竄擾斷難恃以接濟金積堡

賊勢實已窮蹙其詭計專在阻擾該兩軍糧運冀可退  
兵臣於上年十月初三日接准綏遠城將軍定安文稱  
蒙

恩飭部撥賑難民降眾董福祥等銀十萬兩一款尙存  
退還糧價筏價銀二萬兩咨臣撥交成定康作爲湘軍  
運費等因之時臣知運道專恃綏德一線必不可恃當  
卽飛咨定安撥交署甯夏將軍金順爲湘軍辦糧嗣准  
金順來文甯夏不能採辦前項銀兩仍擬交定安代辦  
又經臣飛咨定安懇卽迅速派員採買并購駱駝由陸



起運接濟湘軍臣恐此項銀兩業已起解在道定安無  
款挪墊又在山甘捐局撥銀二萬兩專檄派委記名副  
都統喜勝俟山西銀兩解到卽費銀前赴包頭稟商定  
安雇船裝運如河水未解卽買駱駝陸運在案又准劉  
松山牘稱該軍駝隻倒斃極多惟阿拉善旗尙可採辦  
臣亦飛咨阿拉善親王貢桑珠爾默特代辦駝隻卽由  
劉松山如數給價然道路寫違文報往還動輒兩三月  
之久湘軍兵食缺乏岌岌可虞臣日夜焦思寢食俱廢  
又於本月初十六兩日飛咨金順張曜懇其在該營

糧內各借一二百萬斤接濟劉松山軍食糧價運卹由  
劉松山先撥銀二萬兩如劉松山營次無銀歸款卽咨  
由臣照依買價解還亦在案惟臣於定安金順處已緘  
牘交馳情詞迫切無可再加而劉松山金運昌軍食除  
包頭寧夏兩處而外實別無設法之處惟有顛懇

天恩飭下定安金順張曜無論如何爲難總須設法撥  
濟該兩軍軍食保茲勁旅以全大局實爲萬幸謹附片  
陳明伏乞

聖鑒謹

奏 同治九年正月二十二日

軍機大臣 字寄同治九年正月三十日奉

上諭左宗棠奏賊蹤紛竄現籌剿辦情形並自請嚴議  
暨請飭定安等撥濟劉松山等軍食各摺片所陳金積  
堡逆回經官軍痛剿後竄之黑城半角城等處提督丁  
賢發於石峽口敗之其由環慶竄出各股亦經副將蕭  
玉元等軍先後擊敗惟前據劉典馳奏逆回竄擾陝境  
及昨日李鶴年李宗義所報邊馬已至大荔羌白潘驛  
等處各情是賊蹤之紛竄陝疆者股數不一且自西及

東到處蔓延左宗棠督師西向未能將後路嚴密布置致全陝肅清之地復遭蹂躪實屬咎無可辭左宗棠著交部嚴加議處劉典雖因留防兵少堵禦不及而於所轄地方並不先事圖維致令賊蹤竄入亦著交部議處現在咸陽涇陽一帶徧地皆賊陝垣得以拒賊者僅恃一綫渭河兼之密邇晉豫防剿甚爲緊急左宗棠所派李輝武一軍兵力尙單著添撥勁旅星馳入陝會同劉典所派各軍合力剿擊淨掃賊氛儻該大臣等觀望遷延任令賊匪縱橫舉動全局則該大臣等自取咎戾朝

廷亦不能曲加寬貸也劉松山金運昌兩軍圍攻金積堡踞匪現正得手所有該兩軍軍食自應迅籌撥濟以資飽騰定安金順素顧大局無論如何爲難務須代辦糧米駝隻設法接濟俾免匱乏之虞是爲至要將此由六百里諭令知之欽此

剿辦固原東山回土各匪擒斬巨逆摺

奏爲官軍剿辦固原東山回土各匪情形擒斬積年巨逆恭摺馳陳仰祈

聖鑒事竊平原之固原涇州之鎮原慶陽之環州壤地相連周千餘里其近固原東境者俗呼東山收復以後招輯災黎安撫良回散賑墾荒粗有頭緒而地形遼遠山勢叢錯兵燹之後人物彫殘回土各匪乘間出沒聚散靡常伺便劫殺自陝西提督雷正綰題奏提督周蘭亭總兵張福齊徐文秀各軍前進金積堡西南秦渠一

帶臣比飭記名周紹濬率所部五營分布固原以北之黑城子李旺堡半角城副將桂錫楨扼四百戶提督丁賢發自鎮原出固原道員魏文燾提督劉端冕由慶陽舍水步步前進遙爲犄角清後路游匪護中路轉輸爲控制北路之計上年十月二十二日回民王萬益報賊騎擾及半角城三十里之西陶家維時桂錫楨在半角城聞信急督馬隊掩之斬殺六七十騎餘逆倉皇敗遁生擒劉鳳才丁鳳至馬生財馬四兒等四名奪獲騾馬二百餘匹雜糧三十餘石訊據賊供逆目明先行即明

七十子噓逆回馬子英馬新明馬升老等千餘騎自固  
原東北之下馬關窺來圖截官軍糧道訛畢斬於軍前  
收隊回防訶該逆嘯聚殘黨折竄西陶家復圖抗拒周  
紹濂派總兵張大雄自李旺堡擊其東桂錫楨馬隊自  
半角城擊其西二十三日四鼓各營乘月色微茫銜枚  
急進齊抵西陶家逆騎方排山口而陣瞥見官軍馬步  
兩路衝殺直前賊卽越澗翻山紛紛鼠竄官軍乘勢抄  
擊斃賊二千餘名帶刀矛鎗礮傷者無算奪騾馬三十  
餘匹收隊回馬家壩子山谷中橫出悍賊百餘騎張大



雄嚴陣猛撲斬敵十餘名該逆仍奪路東竄此十月二十  
十二三日桂錫楨張大雄剿辦土回獲勝情形也二十  
三日魏光燾率隊抵環縣二十四日黎明詢逆騎夜襲  
環縣迤北六十里之紅德城比督隊馳救賊已向西川  
一路遁去魏光燾麾軍緊躡二十里及尾賊百餘正牽  
牛驢緣峻坂而上下臨環水提督左日升總兵夏奉朝  
率馬步隊斜出山右搶過賊前魏光燾督各營從後蹙  
之該逆自相蹂籍官軍乘而殲之其跳崖斃水得脫者  
十數賊而已收隊回紅德城休息以奪獲賊中糧畜散

給堡民二十六日進紅德城六十里之山城地方沿途  
乏水土卒負冰以行二十七日直抵萌城已去慶陽四  
百一十里去環縣二百餘里矣魏光燾正揮隊圍攻該  
寨指索擾害紅德城之賊回目羅復章馬柏森等出寨  
羅拜訢日前竄擾紅德城賊目係明七十子架名萌城  
實則萌城良回未預逆謀且願備馬械聽調遣維時預  
望城已撫回目馬添發黑城子把總馬文昭亦來具保  
萌城良回永無反覆魏光燾察其情詞真功慰諭之率  
師由紅德城回慶陽忽接署鎮原縣知縣廖溥明報明

七十子一股又竄至固原東北喉元城子三角城土回  
海生春馬正榮海滿相等出白家壩關堡臺攻掠鎮原  
縣東北姜家孤堡固原古城川鎮原南山洞土匪亦乘  
間竊發臣比飭親軍副將銜儘先參將劉錦臣留閩儘  
先補用參將馮南斌橫出鎮固之交節節搜羅檄魏光  
燾自環縣而西丁賢發自固原而東兩路抄截該逆伺  
官軍分道掩至循環固鎮交界之三分地方宵遁元城  
子盧家灣可北趨預望韋州以達金積堡魏光燾先期  
約劉端冕分派隊伍合力搗巢十五日官軍先後出抵

三岔道出三角城派候選州判朱寶常都司龔福祥彭桂馥千總李松泉誘擒土匪頭目吳成章斬之十七日行八十里止馬家河距賊巢六十里魏光燾傳令各營潛師夜起出賊不意提督甘大有參將譚楚光由左路進攻盧家灣左日升步隊繼之魏光燾親率參將于維槐夏奉朝馬步由右路進攻元城子知縣范廷樸副之十八日五鼓抵白家灣近元城子士窖鱗次進眾翕聚其間不虞官軍驟至也比各營擂鼓發號齊進該逆倉皇出窖向元城子狂竄魏光燾催隊緊躡甫近元城子

土城城上角螺齊鳴賊眾馬步千餘開城迎敵白家灣  
敗逆亦回頭吶喊而來魏光燾分枝以應援賊自督步  
隊緊結方陣橫搏中堅馬隊張兩翼而進夏奉朝于維  
槐策馬衝突立斬悍賊十餘名賊眾大敗有飛馬東奔  
者有折回土城者官軍蹣跚猛擊立將元城子及附近  
之塼城子楊坵等堡掃蕩一空追至白家塬適甘大有  
譚楚光亦將盧家灣沈家莊各處賊巢掃蕩來會賊分  
道狂奔一西竄白家塬一北竄預望城官軍仍收隊回  
元城子計是役共斃賊五百餘名生擒回目海生春之

兄海生獻及餘黨六十餘名分別斬釋拔出男婦老弱  
難民三百餘名奪獲牲畜二百餘頭官軍勇丁陣亡十  
餘名此十一月十八日魏光燾會合劉端冕所部兩營  
攻破元城子盧家灣賊巢獲勝之情形也方魏光燾之  
會師擣巢也丁賢發已率所部出固原之古城川大石  
溝搜剿土匪十九日越大石溝近關堡擊擒賊數百自  
白家壩竄來官軍預伏山側伺賊近前揮隊奮擊陣斬  
十餘名墮崖落澗者二三十名餘逆越山狂遁不復成  
列生擒馬福有馬正海閔起費海恭起海金江收隊回

關堡臺忽謀報明七十子敗黨復由預望竄距元城子  
迤西五十里之道蓮寺馬得中零騎逃逸望南界下河  
川距驛馬關不遠二十一日魏光燾挑壯士乘月夜襲  
道蓮之賊四鼓抵賊巢甘大有夏奉朝瞥見窰內火光  
閃爍知賊踞其中下馬挺矛首先殺入勇士繼之擒斬  
極多零星逸出者不過二十餘騎擒逆目苟幹臺供明  
先行帶十餘騎於二十日早過道蓮寺不知去向訛舉  
斬之二十三日魏光燾分營扼驛馬關會同留防各營  
偵緝殘匪自率馬步進白家堞良回楊如雨迎候道側

稱海生春數創之後懾伏兵威現距此不遠求准其收撫貸其一死魏光燾卽以楊如雨爲嚮導派副將舒萬勝都司范潮海單騎前往提海生春及其眷屬到營訛係被明七十子逼脅入夥實非甘心從逆魏光燾勒限悉繳馬械細獻要犯贖罪隨據海生春率同馬得中剡文興海滿和海維海江等款營待罪呈繳戰馬八十四軍械六十件楊如雨亦具連坐甘結保其永不滋事魏光燾比將海生春等交楊如雨管押以其餘眾八百餘口安置白家壩附近地方請示前來

臣

查固原東山土



回種落繁衍門戶各別回眾中自相推擇有總事有頭目北五營總事卽楊如雨丁有旺副之東四營總事海生春頭目則海滿和海起舞馬三科海義泗也南五營總事馬得中剡文興二人明先行卽明七十子馬正榮馬興寶穆仲元皆頭目也楊如雨本屬良回海生春馬得中等向與母仲元同居固原州城上年八月內被陝回裹脅出城逃竄元城子三角城一帶此次明先行劫眾跳梁海生春等尙知及早歸順情有可原當發去良民門牌交魏光燾轉給該降回予其自新以昭

朝廷寬大之德同時固原州城守營千總陸希正緝獲逆目馬歲兒子海苟苟子各犯由丁賢發派游擊黃義勝押解臣營訊係糾黨在平涼安國鎮劫殺者斬之在逃之著名首惡明先行即明七十子剡仲祿海彥虎海興和海揚昌海上王馬如意明集成馬占全馬正榮等仍勒限海生春細獻丁賢發陣擒在押之馬福有等五犯已飭分別斬釋此官軍辦理固原東山土回剿撫兼施之大略也鎮固土匪自安家山寨惠常魁孫家窩孫百萬等伏誅之後續據代理鎮原知縣廖溥明鎮原千

總劉定洲拏解鎮原匪目惠文魁固原匪目黃登舉到  
營訊係疊攻民堡要犯斬之嗣十一月十四日劉錦臣  
馮南斌道出鎮原向南山洞搜捕而進協同廖溥明劉  
定洲都司封虎臣購線擒何秀義何秀儒何世落到案  
代理平涼知縣留陝府經歷縣丞王啟春亦先後弋獲  
屬尙勤蘇老五雷益發各犯皆籍隸固原其平涼之杜  
大福張文緒二犯亦經王啟春緝獲臣按名提訊均積  
年劫掠攻堡肆行殺掠巨惡屬尙勤曾攻破華亭縣城  
杜大福張文緒入平涼城戕害城守營外委孟姓邊姓

據佔其妻均經分別斬梟傳首犯事地方以伸

國法而快人心所有官軍剿辦東山回土各匪擒斬巨  
逆情形謹會同幫辦甘軍務署陝西撫臣劉典恭摺據  
實馳陳伏乞

皇太后

皇上聖鑒訓示施行謹

奏

同治九年正月二十二日

軍機大臣奉

旨知道了欽此

劉松山陣亡現籌辦理情形摺

奏為劉松山疊攻賊壘克獲大捷中礮殞命現籌辦理  
情形據寔馳陳仰祈

聖鑒事竊劉松山一軍上年十一月十五夜至臘月二  
十五日進剿逆回攻破寨壘疊獲勝仗情形經臣於正  
月二十二日馳報其上臘二十九日剿賊新揭堡獲勝  
及止月初八日攻破金積堡附近地方陝回新修賊壘  
各公牘尙未接到正月二十五日接劉松山十四日來  
牘據稱初十夜四鼓吳忠各營飛報有馬步賊千數百

名由東南胡家堡直至秦渠南踞石家莊一帶空堡及馬五馬八條馬七三寨劉松山以石家莊距吳忠堡東南四五里該各寨扼秦渠之要與下橋永甯洞水口緊接地勢在所必爭立督步隊四營及親軍馬隊馳返吳忠堡天明抵石家莊見賊已於西南廢堡修成三壘矣劉松山飭提督譚拔萃周國勝李占椿易致申曾松明朱德開副將趙彩照等三路齊進各指一壘奮力齊攻一鼓克之其東西兩壘賊逸出者投入馬五寨劉松山卽令易致申朱德開李占椿分駐三新壘計斃陝回甘

回一千數百名頭目馬福喜亦經焚斃生擒七十二名  
正法軍前弁丁陣亡者三十七名受傷者一百零七名  
收隊後劉松山周覽正南馬五寨正東馬八條馬七兩  
寨牆厚壕深殊不易攻留之則終爲後患遂令各營逼  
寨築壘以便圍攻十二十三兩日壘成十四日飭各營  
齊隊往攻未下午後忽有援賊馬步約二千餘自東南  
馳至排列營前二三里以時日考之當卽臨洮謝四及  
靖遠馬韓子也劉松山慮其入寨助守以抗官軍適是  
夜金運昌已將馬殿魁各寨攻克擒斬甚多十五日商

令金運昌先剿援賊黎明各路齊出步賊陣於各破莊之前騎賊左右排列布隊甚整劉松山令先剿騎賊李占椿趙彩照分左右抄擊火器迸發刀矛繼進騎賊先奔步賊仍屹立不動劉松山麾各軍奮威衝殺賊殊死鬥屢卻屢前騎賊仍縱馬回撲官軍銳氣百倍縱橫盪決斃悍賊甚多賊始向東南胡家堡一帶竄遁沿途冰凌凝滑馳走不前官軍追殺五里乃收隊計共斃馬步悍賊近千名奪獲善馬百餘匹鎗械無算劉松山傳令乘勝攻馬五寨寨大而堅悍賊踞寨東一卡誓以死抗



劉松山飭譚拔萃周國勝李占椿曾松明攜攻具攻寨  
飭易致中朱德開趙彩照帶所部截馬七寨馬八條寨  
來援之賊商令金運昌率兩營列隊該寨東北防馬五  
寨逸出之賊布置定譚拔萃等麾所部由寨邊繞出逕  
薄外卡一鼓齊登克之外卡悍賊百數十名無一脫者  
劉松山急督各弁丁舉薪焚寨門策馬由寨下督攻益  
急忽爲寨中飛子洞中左乳墜馬弁丁負入破屋中譚  
拔萃等聞統領受傷齊來省視劉松山叱令速督所部  
猛攻毋庸顧我亂行列譚拔萃周國勝曾松明李占椿

見統領受傷含淚而出手執火包四面梯登督各弁丁  
徠附繼上縱火延燒見賊卽斫寨賊焚死溺死墜牆墮  
井死者無數生擒賊目馬五收隊繳令劉松山諭以受  
傷已重不得復活爾等殺賊報

國我死不恨言畢氣絕是時攻馬七寨馬八條寨之隊  
仍未撤也據總理湘軍營務布政使銜卽選道法福凌  
阿巴圖魯劉錦棠記名提督瑚松額巴圖魯黃萬安分  
統左軍記名提督江蘇蘇松鎮總兵法福凌阿巴圖章  
章台才分統右軍記名提督綢武巴圖魯蕭章開會稟

前來臣接閱之餘悲悼不已竊維劉松山由湘鄉勇丁  
從征積功洊擢廣東陸路提督轉戰湖南湖北江西廣  
東福建江南河南陝西山西直隸山東甘肅各省剿辦  
長髮捻回各巨寇無役不從無戰不克叠蒙

天恩頒賞小刀火鑷大荷包小荷包

賞換達桑阿巴圖魯勇號

賞穿黃馬褂

賞給三等輕車都尉世職劉松山感荷

殊恩力圖報稱自入靈州以來蕩平堡寨五十賊巢九

十餘皆策馬前行躬冒鋒鏑回逆之曾犯顏行者無不  
聞名膽落上年七月初師由花馬池前進時馬化澹潛  
調西寧馬尅三喉撤回助逆馬尅三以千五百騎應未  
及一月經劉松山剿敗喪其大半遁歸自此西寧逆回  
不敢復至西寧鎮總兵黃武賢前來營時爲臣具道其  
詳彼時劉松山不辨其爲西寧回番與各堡甘回未形  
諸公牘也河州逆回馬占鰲前在寧夏大言以股眾助  
陝回及劉松山屢捷目覩軍威不敢復逞故此次馬化  
澹求援於臨洮謝四及靖遠馬等子而河回未與之俱

其威震西陲如此臣方冀靈州蔽役奏請駐師寧夏以  
取猛虎在山之勢爲西陲規久遠不料事未了而忽有  
此變也其治軍嚴不尙苛察其臨財廉不肯苟取其布  
陣方圓平銳叠用得古人靜如山動如水之義其居心  
仁厚而條理秩如語及時局艱危輒義形於色不復知  
有身家性命從征伐者十有八載僅因募勇歸籍一次  
家居十餘日耳年已三十有七聘婦未娶者二十餘年  
臣由直隸西旋時知其婦家送女至南陽已兩年餘矣  
屬其行抵洛陽於募勇未到之暇剋期完婚適甘肅土

匪二十萬蔓及延榆綏一帶臣飭其派隊由山西渡河  
入秦劉松山奉檄居婚期甫半月耳觀人於微雖古良  
將何以過之合無仰懇

天恩飭部將劉松山照提督陣亡例從優議給

卹典

加恩予諡

飭祀京師昭忠祠並

准陝甘各省建立專祠而以所部陣亡各員并附祀其  
劉松山各處戰蹟並乞

宣付史館立傳表彰以慰忠魂其遺櫬一俟道路疏通  
臣當派員護送歸籍仰副我

皇上軫念忠勤至意所有剿敗援賊攻克寨壘統將捐  
軀各情形謹據寔馳

奏伏乞

皇太后

皇上聖鑒訓示施行謹

奏  
同治九年正月二十七

請  
貴劉錦棠京銜并派總統幫辦片

再劉松山馬步全軍員弁勇丁均湖南人而籍隸湘鄉者尤多於此時而謀接統之將非能調護諸將而才堪一面之寄者不可查有現在總理該軍營務布政使銜卽選道法福凌阿巴圖魯劉錦棠本劉松山之姪隨同劉松山轉戰各省於用兵機宜夙有領會膽畧甚優在該軍總理營務已久軍情熟悉以接充總統惟老湘一軍營哨各官多已保至提鎮總統之員非位望稍崇不可劉錦棠自晉入陝由陝赴甘戰功卓著本應保獎之員可否仰懇



天恩生賞劉錦棠京銜以至鎮壓伏候

聖裁又記名提督頭品頂戴瑚松額巴圖魯黃萬友與  
劉松山同爲

予諭壯武前市政使銜卽選道王鑫舊部現在該軍辦理營務穩練勇往素得軍心堪以派充幫辦 謹微飭  
遵照以定軍心理合

奏伏乞

聖鑒訓示施行謹

奏 同治九年正月二十七日

請飭定安速解老湘卓勝兩軍軍食片

再金積堡地勢平衍賊所惟以穩抗官軍者秦漢二渠耳兩渠導源大河皆山西而東匯而北仍入大河渠尾之要在下橋永寧州地屬靈州劉松山上年八月郭家橋大捷後急爭此地故不爲賊所困昨兩次援賊之來未入金積而先向東南似其詭謀仍注意於此劉松山所以急起剿之也渠首之要在龍王廟峽口地屬中衛峽口高於渠身距雷正綽駐營之處四十里雷正綽未及預防十三日忽有逆回突至修築三壘比雷正綽周

蘭亭督隊馳往廛戰竟日而三壘未拔弁勇傷亡乃至  
二百餘名之多臣得報後急飭陝安道黃鼎率所部及  
提督周紹濂兩營丁賢發兩營八成隊伍於護運軍糧  
之便星馳往剿查馬化澂所居之堡牆高且厚外環深  
濠兩道勢難力攻臣曾與劉松山商及非引渠灌堡不  
可引渠非俟春暖冰融不可如黃鼎此行能奪回峽口  
之要兼採中節之糧則猶在驚蟄以前各軍不爲賊困  
且可制賊也惟劉松山所部糧食短絀雷正綰周蘭亭  
張福齊徐文秀各軍之糧均盼臣處轉輸已有朝不謀

夕之勢金運昌一軍則更無可望此大局之最可憂者  
合無仰懇

天恩飭定安速籌運解金順將所部封存之糧暫爲借  
濟俾湘卓兩軍不致因飢潰散則事有可爲大局之幸  
至郭寶昌上年赴晉稟帶所部步隊兩營馬隊一百同  
去據稟已呈請山西撫臣乞假養病而昨接金運昌來  
稟則有請飭郭寶昌勿藉口養病致悞大局等語查郭  
寶昌赴晉之前曾稟稱力顧金運昌運道而後此未聞  
解運一次軍糧其徒託空言已可想見宜金運昌有此

不平之鳴應懇

天恩飭山西撫臣傳諭郭寶昌於河冰銷化晉防解嚴之時迅卽渡河將吳堡存糧百數十萬斤解赴花馬池以資接濟謹附片陳明伏候

聖鑒訓示施行謹

奏

同治九年正月二十七日

同治九年二月初五日內閣奉

上諭左宗棠奏提督剿賊大勝中砲陣亡懇請優卹予諡建祠一摺廣東陸路提督劉松山於正月初十日督

軍進剿甘肅石家莊回匪攻克該逆新修各寨斃匪一千數百名復進攻馬五寨忽有援賊二千餘名排隊營前十五日劉松山會同金運昌迎剿擊斃馬步悍賊約千名餘匪竄遁攻破外卡各軍一鼓齊登劉松山策馬督攻其急忽寨中飛子洞中左脅受傷甚重即時陣亡劉松山由勇丁轉戰湖南等處十餘省剿平粵捻各巨寇謀勇兼優無愧名將此次西征回匪策馬前行躬冒鋒鏑該逆聞風膽落方冀攻克金積堡掃蕩而前肅清邊圉不料中道陣亡覽奏曷勝悼惜劉松山著照提督

陣亡例從優議卹加恩予諡入祀京師昭忠祠並於陝甘等省立功地方建立專祠所部陣亡各員查明一併附祀該提督各省戰蹟並著宣付史館立傳其遺親回籍著沿途地方官妥爲照料以示朝廷軫念忠勤至意欽此

同治九年二月初五日內閣奉

上諭左宗棠奏提督劉松山陣亡後該軍統率需員查有布政使銜候選道劉錦棠膽畧尙優軍情翕服堪以接統請賞加京銜等語劉錦棠著賞加三品卿銜接統

劉松山舊部用資鎮率欽此

軍機大臣 字寄同治九年二月初五日奉

上諭左宗棠奏請訪定安等速解湘卓兩軍軍食等語  
劉松山金運昌兩軍軍食缺乏左宗棠因雷正綰等軍  
須爲接濟無暇兼顧著定安金順懷遵前旨代辦糧食  
駝隻迅籌接濟左宗棠所稱金順所部封存之糧約有  
若干如於此項糧石內撥解更爲迅捷現在該軍正在  
喫緊之際斷不可稍分畛域致有貽悞金順於撥解後  
卽可咨商定安籌款購糧陸續運往以備存儲郭寶昌



一軍現在晉省防河正當喫重未便前往其吳堡所存糧百數十萬斤著劉典查明派委妥員分起解赴花馬池以資接濟毋許遲誤劉松山陣亡後該處軍情若何金積堡何日可以攻克劉錦棠已賞加三品卿銜接統其軍該大臣務當隨時激勵毋令勁旅頽廢提督黃萬友准其派爲幫辦以資得力回逆東竄邊馬已及大荔等處陝省留營甚少左宗棠務當撥兵迅速援應不得置之不顧陝西日來情形若何能否攔截匪蹤勿使紛竄著劉典隨時據寔奏聞並飭各營將弁加緊截剿力

掃兇鋒晉省西南河防緊要並著李宗義檄令李慶翱  
勤加偵探毋稍疎虞沿河各邑人心是否收定務當嚴  
密布置勿涉張 此由六百里各諭令知之欽此

軍機大臣 字寄同治九年正月二十四日奉

上諭劉典奏回逆分竄陝境情形暨擊退竄涇賊股收復定邊各摺片回匪竄擾陝境攻陷定邊襲陷安定賊蹤飄忽肆行奔突左宗棠回援之軍轉落賊後該督撫等同辦一事何以彼此不相聯絡致誤事機現在瓦窑舖踞匪勢甚兇悍慶陽之賊又復竄至三水繞竄永樂店窺伺省城且尙有陳瞎子一股亦思竄陝定邊之賊攻撲寧條梁鎮靖堡等處並有另股賊匪滋擾希圖下竄賊蹤紛至沓來幾至不可收拾安定定邊雖據奏稱

收復殊不足恃著卽將寔在情形查明具奏左宗棠入  
甘後自應酌留重兵力顧後路劉松山金運昌所部本  
係分紮花定何以不遵札飭竟行相繼前進雷正綰周  
蘭亭張福齊簡敬臨等四軍左宗棠祇令其剿辦牛角  
城等處踞逆何以道員曾傳理竟令各軍進發以致回  
逆乘虛竄入各軍進止自由無所約束該大臣當嚴申  
號令立將貽誤各員查明參奏以示懲儆馬德昭一軍  
前據左宗棠奏調已諭李鶴年飭令該提督督帶所部  
扼紮三原該軍抵陝後著劉典會商左宗棠妥籌調度

陝省防兵過單左宗棠務當抽撥勁旅回顧陝疆迅將分竄各匪盡數殲除毋稍鬆勁劉典仍當嚴飭陳照臺成光裕等分投堵剿以遏狂氛不得徒事張皇毫無展布陝事一日不靖卽蔣志章抵任劉典亦不得置身事外著卽振刷精神亟圖補救毋得因循諉卸自干咎戾安定瓦窑鋪一帶距晉匪遙現在河冰未泮李宗義當督飭李慶翱等嚴密防堵毋稍疎忽豫師前已賞給副都統銜簡放西甯辦事大臣所遺蘭州道員缺已將張瑞珍補授矣著左宗棠卽知照豫師迅赴新任並將應

辦事宜妥爲經理以副委任將此由六百里各諭令知  
之欽此

軍機大臣 字寄同治九年二月初六日奉

上諭劉典奏水陸各軍剿賊獲勝現飭山內各營設法  
兜剿等語回首馬正剛股匪圖渡渭河經副將陳瑞齡  
等擊剿該逆折竄洛西蒲城地界又經總兵張佑庭夏  
奉朝等沿途追剿斬馘甚多悉向北山竄走其竄入甘  
泉之匪復由勞山東竄其回逆由甘肅靈環下竄者未  
必非圖擾陝境陝西延榆綏各屬土匪游勇日久蔓延  
疊經諭令劉典認真搜剿現在回逆竄入更恐勾結爲  
患著劉典嚴飭劉端昆劉聲集張佑庭等實力兜剿迅

圖殲滅左宗棠亦當飭令夏泰朝等會合夾擊務將該  
匪就地殲除毋留餘孽倘令該匪再行肆竄卽惟左宗  
棠劉典是問北山一帶現有匪蹤晉省河防更形喫重  
著李宗義懷遵疊次諭旨飭令李慶翱郭寶昌督飭在  
防各軍嚴密堵禦毋稍疏懈現在陝西腹地雖無賊蹤  
甘肅進攻金積堡各軍糧運梗塞著劉典迅速設法疏  
通以濟軍食將此由五百里各諭令知之欽此



軍機大臣 字寄同治九年二月初九日奉

上諭劉典奏擊敗延榆綏屬境竄回現籌調營會剿請將陣亡員弁議卹暨劉端冕所部剿賊獲勝各摺片回逆馬正和等由金積堡出竄安邊分撲靖邊堡勢甚兇悍成定康會同彭緒所出隊合擊該逆擁眾環攻復經官兵擊敗賊始東竄西來逆股亦向邱家坪竄去其竄擾米脂東北城門之賊旋經該處民團擊退現在葭州境內及榆林屬之鎮川堡一帶均有回蹤劉典擬調各營會剿著卽嚴飭劉厚基攔頭堵截並迅催宋慶抽撥

勁旅跟蹤會擊務將此股殲除惟回逆此次竄陝股數  
既多而自西迄東其勢又甚剽疾陟氣一日不靖則甘  
事益費周章左宗棠身總帥干不得稍存膜視仍著懷  
遵前旨添撥得力隊伍星馳入陝會合劉典所調各軍  
併力掃蕩毋任日肆蔓延米脂葭榆各境與晉疆相距  
匪遙該省河防喫重李宗義亦當遵奉疊次諭旨檄飭  
李慶翱郭寶昌督率在事將士寔力嚴防毋稍疏虞成  
定康所部陣亡之擬保提督記名總兵劉求益擬保總  
兵成榮華擬保副將參將皇崑山擬保副將銜游擊殷

忠廷擬保參將都司易培文擬保參將銜都司王世貴  
蕭得貴游擊張永田毛德武擬保游擊都司鄧萬盛都  
司張貴和守備余發勝倪顯濤成紹龍擬保守備千總  
羅聯陞擬保守備銜把總羅煥新成增光暨米脂縣團  
紳訓導高仲魁均著交部照擬保官階從優議卹馬正  
剛一股折走洛川復橫出郿甘交界之道左鋪疊經官  
兵追擊斃賊甚多回逆馬呼來等勾結土匪游勇由宜  
洛交界之孟家嘴竄至郿陽又經官兵擊敗分竄韓城  
等處卽著劉典迅飭傳開德等率隊躡追一面飛咨馬

德昭渡渭夾擊毋稍遷延其由清澗境內圖擾腹地之  
馬正和一股並著催令李輝武等各率所部相機兜剿  
北山一帶爲土匪游匪伏匿之所此時回匪縱橫難保  
不互相煽惑肆行滋擾劉典務當振刷精神督飭在陝  
諸軍力圖撲滅不得藉口兵單致滋延誤榆林靖邊各  
邑逼近邊牆竄突堪虞著定安檄飭防軍於鄂爾多斯  
各旗境內嚴密堵剿勿任滋擾將此由六百里各諭令  
知之欽此

軍機大臣 字寄同治九年二月十六日奉

上諭現因陝西回逆紛竄關中留兵不敷分剿已明降  
諭旨令李鴻章先赴陝西督兵剿辦矣西路回逆分竄  
秦境蔓延榆綏延各屬該處土匪潰勇本未芟除淨盡  
深恐勾結爲患左宗棠西駐平涼離陝已遠而北攻金  
積堡南顧秦州兵力亦屬不敷况劉松山陣亡良將漸  
少邊外糧運之路又無兵可以保護是該大臣支絀情  
形深可垂念雖歷次降旨令左宗棠派兵赴陝諒亦因  
前敵喫緊無可抽調李鴻章本令督兵入黔其月餉早

經籌定而郭松林等軍尙屬不少且援陝之師無須大支勁旅不必與諸將領面商再行定議卽著就現有之兵先行統帶入陝迨日迅速前進將寶陝各回逆悉數掃除並著扼要駐紮與定安李宗義劉典所派各軍聯絡聲勢加意防範毋任逆蹤恣意東竄其北山土匪潰勇並著派得力之師次第搜捕淨絕根株俾左宗棠得以專心辦理甘肅軍務不至有跋前疐後之虞所有甘肅回匪卽責成左宗棠督剿務當廣籌方畧將金積堡等處逆圖克復掃蕩而前以紓朝廷西顧之憂左宗棠

定安李宗義到典亦當隨時與李鴻章和衷商酌益臻  
周密金順剿辦王家疃莊近日能否得手務與張曜竭  
力進攻毋得遷延觀望寧靈距定邊不遠亦當與李鴻  
章隨時關會免致疎失李鴻章俟陝境肅清再行督兵  
赴黔以靖邊隅本日據袁保恒奏老湘草勝兩軍飢疲  
之餘所存不過十之五六請飭歸併等語該兩軍旣多  
缺額他營亦所不免現在餉項短絀豈可任其冒濫著  
左宗棠統飭查明核寔歸併以節餉需將此由六百里  
各諭令知之欽此

軍機大臣 字寄同治九年二月十八日奉

上諭劉典奏回逆分途竄擾剿獲勝並賊竄北山各  
官軍防剿情形各摺片覽奏均悉回逆馬呼來一股搗  
及同官宜君等處經張佑庭等督隊追剿該逆由楊家  
店向甘境狂奔另股馬長鳳等由宜川竄偏澄城復經  
張佑庭擊退韓邵地境又有大股賊匪竄擾劉端冕現  
已追抵韓城著劉典卽飭劉端冕張佑庭視賊所向合  
力夾擊迅圖撲滅北路延榆綏一帶賊蹤紛竄經喻步  
蓮等督軍追剿並未大加懲創劉典因李輝武所部未



使調令遠征現已添募陝勇千人直隸軍著卽添派  
得力將弁統帶前進迅速剿辦此時老湘軍勝兩軍糧  
運梗阻回逆益肆猖獗若不迅籌堵蕩恐前敵各營軍  
心不固大局何堪設想著左宗棠速將慶環一帶妥籌  
布置杜賊紛竄之路務使運道疏通官軍無後顧之虞  
方可一意進剿該大臣老於戎行諒不至漫無籌畫坐  
失事機也安定擊敗之賊竄至延水關該處逼近河干  
雖經晉省防軍會剿南竄難保不去而復來著李宗義  
檄飭防河將弁嚴密堵禦至韓邵澄各屬沿河地方漫

漫灘處多尤應加意防維毋稍疎忽將此由五百里各諭令知之欽此